

220

生

范古農生日紀念輯
上海佛學書局出版

上海图书馆藏书



A541 212 0010 1604B

生日紀念序

今世人競談生活矣，而於人之何以生，如何生者，均未措意。於是貪生也，於是爭生也，甚至但求己之生而不顧人之生。卒也兩敗俱傷，而人生之家庭以乖，人生之社會以危，人生之世界以亂。至是而所求之生活，其摧殘損折有岌岌焉。不可終日者，余悲之久矣。夫我人之始生也，莫不淨裸裸赤洒洒，未將一粒來，未携一絲至。而我食我衣，莫不賴他人之一片愛我心腸，方能療我飢渴，衛我軀體耳。於斯時也，苟無他人之惠顧我者，其死也可立而待焉。我故曰生活也者，他人給我之物，而非我自己固有之物也。既以他人所給我者爲生活，則生活之權操諸己乎，操諸人乎，不待言而知矣。我之生活既操諸人（直接者父母，間接者羣衆）則我而不欲受惠於人也，不談生活可也。我而既欲生活

矣。則人之生活我者而不知感其恩也。豈人情哉。

夫人既不能自己生活而顧率然而來生其愚也可謂極矣。然亦有不得已者耳。何言乎不得已。則生死之故。有不可以不明者。生不徒生。有死爲之因也。既其死矣。如何更生。蓋存乎死生之間者。大有在也。佛之言曰。使死而斷滅也。則不復有生矣。既復有生。是不斷滅也。故曰死有。及其生也。則曰生有。生死相續。必有中間。存乎其中者。則曰中有。三有相續。不常不斷。孰或使之。因緣使之也。因緣數量。如海中波。不可思議。約而言之。三。四十二。此理發明。自非大覺者不辦。夫而後生之不得已者。深切著明。苟欲了生脫死者。蓋亦不患無道耳。

雖然未易言也。生死大海。茫無涯畔。隨流不反。去岸日遙。苟解回頭。當處卽是。孰可歸依。舍佛其誰。夫生死何足畏。所畏者不善生死耳。善生者生而無生。善死者死而不死。是曰應化。是曰涅槃。然此非盡人能之也。無已則有此界之兜

率在西方之極樂。在生乎生乎。捨是焉往。

余今年已半百。回首生平。飭己者荒。益人者罔。慚愧餘生。敢云慶幸。乃集佛語。發明生理。樂我之得生。至今也。理宜感恩。痛我之忽爾而生也。宜明生之狀況。與所以更懼來生之不善也。故述生範以爲則。既以自勉。并以勉人。書既出版。乃序言以達其情。

民國十九年庚午十月初十日嘉興范古農自序

生日紀念 自序

總目

第一章 生恩

第一節 父母恩

第二節 衆生恩

第三節 重頌偈

第二章 生相

第一節 中有生相

第二節 生有生相

第三節 本有增長

第四節 正生位相

生日紀念 總目

第五節 總結生緣

第三章 生緣

第一節 略示生緣

第二節 廣顯生緣

第三節 詳辨名義

第四節 略述緣起差別

第五節 別明緣生次第

第六節 簡明十二支體

第七節 餘門分別

第一項 約四支

第二項 總三道

第三項 別三時

第四項 判假實

第五項 辨緣相

第八節 略說四緣

第四章 生範

第一節 釋迦佛生

第一項 未生前相

第二項 大機所見生相

第三項 小機所見生相

第二節 彌勒佛生

第三節 上生兜率

生日紀念 總目

第一項 菩薩自生

第二項 衆生往生

第四節 往生極樂

第一項 七日往生

第二項 三輩往生

第三項 九品往生

生

范古農輯

第一章 生恩

第一節 父母恩

大乘本生心地觀經云。

父母恩者，父有慈恩，母有悲恩。母悲恩者，若我住世於一劫中，說不能盡。

世間悲母念子無比，恩及未形。始自受胎，終於十月，行住坐臥，受諸苦惱，非口所宣。雖得欲樂，飲食衣服，而不生愛。憂念之心，恆無休息。但自思惟，將欲生產，漸受諸苦，晝夜愁惱。若產難時，如百千刀競來屠割，或致無常。若無苦惱，諸親眷屬喜樂無盡，猶如貧女得如意珠。其子發聲，如聞音樂。以母胸臆而爲寢處，左右膝上常爲遊履，於胸臆中出甘露泉。長養之恩，彌於普天。憐愍之德，廣大。

無比。世間所高莫過山岳。悲母之恩逾於須彌。世間之重大地爲先。悲母之恩亦過於彼。

若善男子善女人爲報母恩。於一劫每日三時。割自身肉。以養父母。而未能報一日之恩。所以者何。一切男女處於胎中。口吮乳根。飲噉母血。及出胎已幼稚之前。所飲母乳。百八十斛。母得上味。先與其子。珍妙衣服。亦復如是。愚癡鄙陋。情愛無二。以是因緣。母有十德。一名大地。於母胎中爲所依故。二名能生。經歷衆苦而能生故。三名能正。恆以母手理五根故。四名養育。隨四時宜能長養故。五名智者。能以方便生智慧故。六名莊嚴。以妙瓔珞而嚴飾故。七名安穩。以母懷抱爲止息故。八名教授。善巧方便導引子故。九名教誡。以善言辭離衆惡故。十名與業。能以家業付囑子故。

善男子。於諸世間何者最富。何者最貧。悲母在堂。名之爲富。悲母不在。名之爲

貧。悲母在時，名爲日中。悲母死時，名爲日沒。悲母在時，名爲月明。悲母亡時，名爲闇夜。是故汝等勤加修習孝養父母，若人供佛福等無異。應當如是報父母恩。

第二節 衆生恩

衆生恩者，卽無始來一切衆生，輪轉五道經百千劫，於多生中互爲父母。以互爲父母故，一切男子卽是慈父，一切女人卽是悲母。昔生生中有大恩故，猶如現在父母之恩等無差別，如是昔恩猶未能報，或因妄業生諸違順，以執著故反爲其怨，何以故。無明覆障，宿住智明，不了前生曾爲父母，所可報恩，互爲饒益。無饒益者，名爲不孝。以是因緣，諸衆生類於一切時，亦有大恩，實爲難報。如是之事，名衆生恩。

第三節 重頌偈

慈父悲母長養恩

一切男女皆安樂

慈父恩高如山王

悲母恩深如大海

若我住世於一劫

說悲母恩不能盡

我今略說於少分

猶如蚊蟲飲大海

世間悲母孕其子

十月懷胎長受苦

於五欲樂情不著

隨時飲食亦同然

晝夜常懷悲愍心

行住坐臥受諸苦

若正誕其胎藏子

如攢鋒刃解肢節

迷惑東西不能辨

徧身疼痛無所堪

或因此難而命終

六親眷屬咸悲惱

如是衆苦皆由子

憂悲痛切非口宣

若得平復身安樂

如貧獲寶喜難量

顧視容顏無厭足

憐念之心不暫捨

母子恩情常若是

出入不離胸臆前

母乳猶如甘露泉

長養及時曾無竭

慈念之恩實難比

鞠育之德亦難量

世間大地稱爲重

悲母恩重過於彼

世間須彌稱爲高

悲母恩高過於彼

若有男子及女人

爲報母恩行孝養

割肉刺血常供給

如是數盈於一劫

種種勤修於孝道

猶未能報暫時恩

十月處於胎藏中

常銜乳根飲脂血

自爲嬰孩及童子

所飲母乳百斛餘

飲食湯藥妙衣服

子先母後爲常則

子若愚癡人所惡

母亦恩憐不棄遺

昔有女人抱其子

渡於恆河水瀑流

以汎水故力難前

與子俱沒無能捨

爲是慈念善根力

命終上生於梵天

長受梵天三昧樂

得遇如來受佛記

是故悲母有十德

隨應義利立其名

一名大地二能生

三能正者四養育

五與智者六莊嚴

七名安穩八教授

九教誠者十與業

餘恩不過於母恩

何法世間最富有

何法世間最貧無

母在堂時爲最富

母不在時爲最貧

母在之時爲日中

悲母亡時爲日沒

母在之時皆圓滿

悲母亡時悉空虛

世間一切善男子

恩重父母如丘山

應當孝敬恆在心

知恩報恩是聖道

有情輪迴生六道

猶如車輪無始終

或爲父母爲男女

世世生生互有恩

如見父母等無差

不證聖智無由識

一切男子皆是父

一切女人皆是母

如何未報前世恩

却生異念成怨嫉

常須報恩互饒益

不應打罵致怨嫌

若欲增修福智門

晝夜六時當發願

願我生生無量劫

得宿住智大神通

能知過去百千生

更相憶識爲父母

循環六趣四生中

令我一念常至彼

爲說妙法離苦因

使得人天長受樂

勸發堅固菩提願

修行菩薩六度門

永斷二種生死因

疾證涅槃無上道

附註

大乘本生心地觀經者，佛於方等會上說心地觀法，并放光明，顯現過去修行成佛之事。唐高宗時，師子國（今錫蘭）王獻其梵本，藏於禁內。至憲宗貞元六年，乃出梵本於醴泉寺。詔京師義學大德闍賓三藏法師般若（華言智慧，姓憍答摩氏，北天竺人，建中二年來唐）等八人翻譯其旨，命諫議大夫孟簡等四人潤色其文，有八卷十三品。是經在清藏興字函，在頻伽藏字帙第二冊內，在大正藏第三卷二百九十一頁。

劫梵語劫波，此言時分，謂世界成壞一期之長時也。約計二萬三千四百三

十八萬四千年爲一大劫。

根爲眼耳鼻舌身，以能對境生識，故喻如根。

瓔珞者，貫串珠玉，懸挂首項，以爲嚴飾也。

五道者，天人鬼畜地獄也。

五欲者，色、聲、香、味、觸五境之欲也。

恆河，印度一大河也。梵語旃伽，此云天堂來，言河源之高遠也。

梵天者，色界初禪天，清淨無欲，故名爲梵。

三昧，此云正定，卽禪定之異名。

佛梵名佛陀，此言覺者，謂自覺覺他，覺行圓滿也。

六道者，天人修羅地獄鬼畜也。前三爲善道，後三爲惡道，世間衆生，盡於是矣。

六時者、初日分、中日分、後日分、初夜、中夜、後夜也。

神通者、心神通達也。其類有六、謂天眼通、天耳通、宿命通、他心通、神境通、漏盡通也。經中宿住智、卽宿命通也。

六趣卽六道、就衆生受報而言曰趣、就所趣之境而言曰道。四生者、卵生、胎生、溼生、化生、此就衆生生時之方式而言也。

菩提此云覺道、佛之智德也。

菩薩此云覺有情、謂覺之有情、覺他有情、及上求覺道下化有情也。

六度者、六種度苦之法。謂布施度慳貪、持戒度毀犯、忍辱度瞋恚、精進度懈怠、禪定度昏散、智慧度愚癡也。

二種生死者、謂界內分段生死、界外變易生死也。

涅槃者、佛之斷德。此云圓寂、謂果德圓滿、惑因寂滅也。

跋語

客曰。子述生恩，但說現在父母恩足矣，何用說衆生恩，涉及過去也。答之曰。有過去方有現在，所以既說現在，不可忘却過去。且子以過去爲不可恃，將置衆生恩於河漢乎。子亦知我人幼時則賴父母以爲生，及其長也，則又賴社會羣衆以爲生乎。一衣一飯之微，皆取之於農工，而農工之耕作，又須其他造作工具之人。轉輾相資，重重無盡。今之人率以金錢勞力自傲，試問其金錢何自而來，非礦工乎。而礦工之生活，轉輾相資，亦遍法界。又問其勞力何由而生，非衣食乎。衣食之來，已如上述。總而言之，人之得生，皆非自力，必賴於人。然則所謂衆生恩者，又豈僅屬於過去，而不關乎現在哉。客乃恍然，謝而退。我卽記此因緣，以作此章之跋。

生

范古農輯

第二章 生相

第一節 中有生相

瑜伽師地論云。

云何生。由我愛無間已生故。無始樂著戲論因已熏習故。淨不淨業因已熏習故。彼所依體由二種因增上力故。從自種子。卽於是處。中有異熟無間得生。有中

因緣死生同時。如秤兩頭。低昂時等。死生同時

而此中有必具諸根。具根造惡業者所得中有。如黑糲光。或陰闇夜。作善業者所得中有。如白衣光。或晴明夜。相狀

又此中有是極清淨天眼所行。是天境彼於爾時。先我愛類不復現行。識已住故。

然於境界起戲論愛。

起境界

隨所當生，卽彼形類中有而生。

同當形

又此中有眼猶如天眼，無有障礙，唯至生處。

天眼如天眼

所趣無礙，如得神通，亦唯至

生處。

身往如得神通

又由此眼，見己同類中有有情，及見自身當所生處。

不見異趣

又造惡

業者，眼視下淨，伏面而行，往天趣者上，往人趣者傍。

相行

又此中有若未得生緣，極七日止，有得生緣，卽不決定。若極七日未得生緣，死

而復生，極七日止。如是展轉，未得生緣，乃至七日止。自此已後，決得生緣。

生時

分限

又此中有七日死已，或卽於此類生。若由餘業可轉，中有種子轉者，便於餘類

中生。

可轉生處

又此中有種種名，或名中有，在生死二有中間生故。或名健達縛，尋香行故，香所資故。或名意行，以意爲依，往生處故。此說身往，非心緣往。或名趣生，對生

有起故。釋異名

當知中有除無色界一切生處。三界有無

又造惡業者，謂屠羊雞豬等，隨其一類，由住不律儀衆同分故，作感那落迦惡不善業，及增長已，彼於爾時，猶如夢中，自於彼業所得生處，還見如是種類有情，及屠羊等事，由先所習熹樂馳趣，卽於生處境色所礙，中有遂滅生有續起，彼將沒時，如先死有見紛亂色，如是乃至生滅道理，如前應知。趣向相

又彼生時，唯是化生，六處具足。中有唯是化生復起是心，而往趣之，謂我與彼嬉戲受

樂，習諸伎藝，彼於爾時顛倒，謂造種種事業，及觸冷熱，若離妄見，如是相貌尙無趣欲，何況往彼。若不往彼，便不應生，如於那落迦，如是於餘似那落迦，鬼趣中生，當知亦爾，如癩鬼等。又於餘鬼傍生人等及欲界天衆同分中，將受生時，於當生處，見已同類可意有情，由此於彼起其欣欲，卽往生處，便被拘礙，死生

道理如前應知。趣向心

又由三處現前，得入母胎。一、其母調適而復值時。二、父母和合俱起愛染。三、健達縛正現在前。胎生緣復無三種障礙。謂產處過患所作。種子過患所作。宿業過

患所作。無三障礙

若無如是三種過患，三處現前，得入母胎。彼即於中有處，自見與己同類有情，爲嬉戲等。於所生處，起希趣欲。彼於爾時，見其父母共行邪行，所出精血而起顛倒。起顛倒者，謂見父母爲邪行時，不謂父母行此邪行，乃起倒覺。見己自行，見自行已，便起貪愛。若當欲爲女，彼即於父便起會貪。若當欲爲男，彼即於母起貪亦爾。乃往逼趣。若女於母，欲其遠去。若男於父，心亦復爾。生此欲已，或唯見男，或唯見女。如是如是，漸近彼之處所。如是如是，漸漸不見父母餘分，唯見男女根門。即於此處，便被拘礙。死生道理，如是應知。於父母起顛倒

若薄福者，當生下賤家。彼於死時及入胎時，便聞種種紛亂之聲，及自妄見入於叢林竹葦蘆荻等中。若多福者，當生尊貴家。彼於爾時，便自聞有寂靜美妙可意音聲，及自妄見昇宮殿等可意相現。福多薄者見聞異相

第二節 生有生相

爾時父母貪愛俱極，最後決定各出一滴濃厚精血。二滴和合住母胎中，合爲一段，猶如熟乳凝結之時，當於此處，一切種子異熟所攝執受所依阿賴耶識和合依託。總標識支依託

云何和合依託？謂此所出濃厚精血合成一段，與顛倒緣中有俱滅與滅同時，卽由一切種子識功能力故，有餘微細根及大種和合而生，及餘有根同分精血和合搏生。於此時中，說識已往，結生相續，卽此名爲羯羅藍位。依託相狀

此羯羅藍中有諸根大種，唯與身根及根所依處大種俱生。卽由此身根俱生

諸根大種力故、眼等諸根次第當生。諸根次第生

又由此身根俱生根所依處大種力故、諸根依處次第當生。由彼諸根及所依處具足生故、名得圓滿依止成就。諸根依處亦次第生

又此羯羅藍色、與心心所安危共同、故名依託。由心心所依託力故、色不爛壞。色損益故、彼亦損益。是故說彼安危共同。識依託色安危共同

又此羯羅藍識最初託處、即名肉心。如是識於此處最初託、即從此處最後捨。初託肉心後從此捨

第三節 本有增長

又羯羅藍漸增長時、名之與色、平等增長、俱漸廣大。如是增長乃至依止圓滿、應知此中由地界故、依止造色、漸漸增廣。由水界故、攝持不散。由火界故、成熟堅硬、由無潤故、由風界故、分別肢節各安其所。增長因緣

又於胎中經三十八七日，此之胎藏一切支分，皆悉具足。從此已後，復經四日，方乃出生。此說極滿足者，或經九月，或復過此。若唯經八月，此名圓滿，非極圓滿。若經七月六月，不名圓滿，或復缺減。增長時節

又此胎藏六處位中，由母所食生羸津味，而得資長。於羯羅藍等微細位中，由微細津味資長應知。增長資稟

復次，此之胎藏八位差別，何等爲八。謂羯羅藍位、遏部曇位、閉尸位、鍵南位、鉢羅睺佉位、髮毛爪位、根位、形位。增長分位

若已結凝，箭內仍稀，名羅羯藍——雜穢、和合。

若表裏如酪未至肉位，名遏部曇——疱、息肉。

蓋已成肉，仍極柔輒，名閉尸——凝結。

若已堅厚，稍堪摩觸，名爲鍵南——堅厚。

卽此肉搏增長支分相現，名鉢羅賒佉——枝分。

從此以後髮毛爪現，卽名此位。

從此以後眼等根生，名爲根位。

從此以後彼所依處分明顯現，名爲形位。

又彼胎藏，若當爲女，於母左脅，倚脊向腹而住。若當爲男，於母右脅，倚腹向脊

而住。胎藏住相

又此胎藏極成滿時，其母不堪持此重胎，內風便發，生大苦惱。胎藏成滿

第四節 正生位相

又此胎藏業報所發，生分風起，令頭向下，足便向上，胎衣纏裹而趣產門，其正

生時胎衣遂裂，分之兩腋，出產門時，名正生位。正出胎相

生後漸次觸生分觸，所謂眼觸乃至意觸。生後觸相

次復隨墮施設事中，所謂隨學世事言說。

學世事相

次復耽著家室，謂長大種類故，諸根成就故。

耽家室相

次造諸業，謂起世間工巧業處。

造諸業相

次復受用境界，所謂色等，若可愛不可愛，受此苦樂，謂由先業因，或由現在緣。

受用境界

第五節 總結生緣

又諸有情，隨於如有有情類中，自體生時，彼有情類，於此有情作四種緣，謂種子所引故，食所資養故，隨逐守護故，隨學造作身語業故。初謂父母精血所引。次彼生已，知其所欲，方求飲食，而用資長。次常隨逐，專志守護，不令起作非時之行，及不平等行。次令習學世俗言說等事，由長大種類故，諸根成就故，此復於餘，此復於餘。

明四緣

如是展轉諸有情類，無始時來受苦受樂，未曾獲得出苦樂法，乃至諸佛未證菩提。顯無盡

若從他聞音及內正思惟，由如是故，方得漏盡。無生因

附註

瑜伽師地論者，彌勒菩薩所說，爲相宗之本論也。瑜伽此云相應，謂與真理相應，猶云如如也。瑜伽師者，具相應智說相應法而爲天人師，卽指佛菩薩也。地者，地位論者，申辨謂以十七地說明瑜伽師之境行果而抉擇其義，故曰瑜伽師地論，論爲無著菩薩所造，玄奘法師所譯，有壹百卷。在清藏猶字至氣字函，頻伽藏來帙一至五冊。大正藏第三十卷二七九頁。

我愛無間已生者，謂衆生將命終時，乃至未到昏昧想，位長時所習我愛現行，由此力故，謂我當無，便愛自身，由此建立中有生報，所謂我愛種子也。

樂著戲論因者，名言種子也。

淨不淨業因者，業種子也。

自種子者，異熟種子也。卽親辦異熟果之因也。

異熟者，果名。所謂異時而熟，異類而熟，變異而熟也。

先我愛者，命將終時所起之我愛也。

大種者，地水火風四大種，所謂堅溼煖動也。

眼等諸根者，淨色根也。

諸根依處者，扶塵根也。

阿賴耶識者，衆生根本依止之識也。此識有三位，其名各異。一我愛執藏位，名曰藏識。二異熟因果位，名曰異熟識。三一切種子位，名曰一切種子識。種子者，識之潛在勢力也。至此識顯現行動時，則謂之現行。

心心所者、心謂眼識耳識鼻識舌識身識意識染污識藏識之心王也。心所者、繫屬於心、爲心所使、如感覺欲望愛憎放肆等心之種類、故又稱心數。中有者、介於生有死有之間者也。生時名生有、死時名死有、生有死有之間、謂之本有。

生

范古農輯

第三章

生緣

一切諸法、從因緣生。一切佛道、皆從此入。今觀外物如草木等生、皆有緣。經云、從種生芽、從芽生葉、從葉生節、從節生莖、從莖生幹、從幹生枝、從枝生萼、從萼生華、從華生子。若無子則不生芽、如是無華則不生子、有子故得生芽、如有華故得生子。因果循環、輪轉不息。外物如此、人生亦然。故述生緣。

第一節

略示生緣

十二門論云、內因緣者、所謂無明、行、識、名、色、六入、觸、受、愛、取、有、生、老、死、各各先因而後生。列名

佛說阿毘曇經云。內因緣義。所言無明緣行。行緣識。識緣名色。名色緣六入。六入緣觸。觸緣受。受緣愛。愛緣取。取緣有。有緣生。生緣老死。次第增長。如有無明故行增長。如是乃至有生故老死增長。若無無明則不生行。若無生則無老死。如有無明故有行增長。如有生故有老死增長。略敘緣生

第二節 廣顯生緣

緣生三十論云。

從一生於三 從三轉生六 六二二更六 從六亦生六

從一生於三者。一謂無智。此無智者。說名無明。於苦集滅道中不覺知故。名爲無智。由無智故。則有福非福不動說名三行。及身行口行心行等。從其轉生。無明緣行緣

從三轉生六者。從彼二行生六識身。所謂眼識耳識鼻識舌識身識意識。行緣識

六二者、彼六識身轉生二種、所謂名色。（名即受想行識四蘊色即色蘊四大）
地水火風所造之四塵色香味觸也。
名色

二更六者、名色二種、轉生六入。所謂眼入、耳入、鼻入、舌入、身入、意入。名色緣六入

從六亦生六者、從彼六入轉生六觸。所謂眼觸、耳觸、鼻觸、舌觸、身觸、意觸。六入緣六觸

從六有於三 此三復有三 三復生於四 四復生於三

從六有於三者、從彼六觸、轉生三受。所謂樂受、苦受、不苦不樂受。觸緣受

此三復有三者、還從彼等三受、轉生三種渴愛。所謂欲渴愛、有渴愛、無有渴愛、

受緣

三復生於四者、從彼三種渴愛、轉生四取。謂欲取、見取、戒苦行取、我語取。受緣取

四復生於三者、從彼四取、轉生三有。所謂欲有、色有、無色有。取緣有

從三生於一 彼一復生七 於中所有苦 牟尼說皆攝

從三生於一者、還以彼等三有作緣、生當來一種生。有緣生

彼一復生七者、還從彼一生當有老死憂悲苦惱困等七種。於中無明爲始、困爲終、無量種苦、世尊略說、皆此所攝。生緣老死

第三節 詳辨名義

佛說決定義經云。

十二緣生者、此等諸法、無明爲緣、乃有生滅。爲緣者何。所謂先際不了、後際不了、中際不了。內法不了、外法不了、內外法俱不了。善業不了、不善業不了、善不善俱不了。因不了、果不了、因果俱不了。已生緣不了、未生緣不了、現在緣法不了。於佛不了、於法不了、於僧不了。苦法不了、集法不了、滅法不了、道法不了。善法不了、不善法不了。罪法不了、福法不了。可行法不了、不可行法不了。高下法不了、有爲無爲法不了。如是不了、不能於黑白法等起無相智。由此無明不能

覺了而爲過失。乃至障如實智，不能證得寂靜涅槃。謂此無明體性迷闇純一癡法。猶如盲者唯行闇道。集諸塵垢，損減智慧。於諸障法不能出離。而此無明與明爲障，爲根本煩惱，爲隨煩惱本，是顛倒處，爲黑闇室。如是等義，名爲無明。由此爲緣，行法得起。行法者，行有三種，謂身行、語行、意行。身行者，謂出入息，依止於身，繫屬於身。由依身故，而出入息得名身行。語行者，謂論難分別。卽此分別論難言辭，故名語行。意行者，謂貪瞋癡心所法等。依止於心，繫屬於心。由依心故，得名意行。復有三行，何等爲三，謂福行、罪行、不動行。是名三行。

由行爲緣，識法得起。識法者，識有六種，謂眼識、耳識、鼻識、舌識、身識、意識。此名六識。

由識爲緣，名色得起。名色者，謂色蘊、受蘊、想蘊、行蘊、識蘊。色者，謂內五塵，皆四大所成。四大者，謂地、水、火、風。地體堅重，水性流潤，溫煖爲火，動轉名風。如是四

大所成五塵爲色蘊。而此蘊法，四蘊名名，一蘊名色。如是五蘊，名爲名色。名色爲緣，六處得起。六處者，謂內六處：眼處、耳處、鼻處、舌處、身處、意處。此名六處。

六處爲緣，觸法得起。觸有六種，謂眼觸、耳觸、鼻觸、舌觸、身觸、意觸。此等名觸。由觸爲緣，受法得起。受有三種，謂苦受、樂受、捨受。如是眼觸緣此三受，乃至意觸亦復如是。此名爲受。

由受爲緣，愛法得起。愛有六種，謂眼觀色、耳聽聲、鼻嗅香、舌了味、身覺觸、意分別法。由貪六法，得名爲愛。

由愛爲緣，取法得起。取有四種，謂欲取、見取、戒禁取、我語取。由愛增故，得名爲取。

由取爲緣，有法得起。有法有三，謂欲有色、無色有、欲有者，謂十惡趣及人天。

十惡趣者，謂八地獄、一等活、二黑繩、三衆合、四號叫、五大號叫、六炎熱、七極炎熱、八無間、九傍生趣、十餓鬼趣。如是十種，名爲惡趣。人趣者，謂四大洲。南瞻部洲、東勝身洲、西牛貨洲、北俱盧洲。南瞻部洲，其量縱廣七千由旬。此洲之相，北闊南狹，猶如車形。東勝身洲，其量縱廣八千由旬。彼洲之相，猶如半月。西牛貨洲，其量縱廣九千由旬。彼洲之相，猶如圓月。北俱盧洲，其量縱廣十千由旬。彼洲之相，四方徑直，猶如池沼。如是四洲，名爲人趣。天趣者，欲界六天。謂四王天、忉利天、夜摩天、兜率天、化樂天、他化自在天。如是名爲欲界六天。此等諸趣，名爲欲有。

色有者，有十八天。謂梵衆天、梵輔天、大梵天、光天、無量光天、光音天、淨天、無量淨天、徧淨天、無雲天、福生天、廣果天、無想天、無煩天、善現天、善見天、色究竟天。此等諸天，名爲色有。

無色有者有四種天。謂空無邊處天，識無邊處天，無所有處天，非想非非想處天。此等諸天，名無色有。如是有三有，得名爲有。

由有爲緣，生法得起。生者，謂有情捨此蘊已，隨業果報，復於界趣蘊相出現。故名爲生。

由生爲緣，老死得有。老者，謂有情蘊法果熟，心識迷亂，多所忘失，髮白面皺，身力羸弱，舉動策杖，喘息呻吟，漸漸力微，諸根衰朽，是名爲老。復何名死？謂諸有情，隨能招業，壽量終盡，識捨執受，命根謝滅，諸蘊離散，是名爲死。謂老無定相，附死立支，二法合一，故名老死。如是名爲十二緣法。

第四節 略述緣起差別

瑜伽師地論云：緣起差別云何？謂於前際無知等，如經廣說。復有七種無知：一世愚，二事愚，三移轉愚，四最勝愚，五真實愚，六染淨愚，七增上慢愚。

身行云何謂身業。若欲界、若色界、在下名福非福，在上名不動。語行云何謂語業。餘如前應知。意行云何謂意業。若在欲界、名福非福，在上二界、唯名不動。眼識云何謂於當來依止眼根了別色境識。所有福非福不動行所熏發種子識，及彼種子所生果識。如眼識如是乃至意識，應知亦爾。由所依及境界所起了別，差別應知。此於欲界具足六種，色界唯四，無色唯一。

受蘊云何謂一切領納種類。想蘊云何謂一切了像種類。行蘊云何謂一切心所造作意業種類。識蘊云何謂一切了別種類。如是諸蘊皆通三界。四大種云何謂地水火風界。此皆通二界。四大種造色云何謂十色處及法處所攝色。欲界具十及法處所攝假色。色界有八及法處所攝色。然非一切。此亦二種。謂識種子所攝受種子名色及於彼所生果名色。

眼處云何謂眼識所依淨色。由此於色已見現見當見。如眼處如是乃至意處。

隨其所應，盡當知於一切處，應說三時業用差別。此亦二種，謂名色種子所攝受種子六處，及彼所生果六處。五在欲色界，第六通三界。

眼觸云何，謂三和所生，能取境界，淨妙等義，如是餘觸，各隨別境，說相應知。此復二種，謂六處種子所攝受種子觸，及彼所生果觸。欲界具六，色界四，無色界一。

樂受云何，謂順樂諸根境界爲緣，所生適悅受所攝。苦受云何，謂順苦二（根境）爲緣，所生非適悅受所攝。不苦不樂受云何，謂順不苦不樂二爲緣，所生非適悅非不適悅受所攝。欲界、三色界、二、第四靜慮以上乃至非想非非想處，唯有第三不苦不樂。此亦二種，謂觸種子所攝受種子受，及彼所生果受。

欲愛云何，謂欲界諸行爲緣，所生於欲界行染污希求，由此能生欲界苦果。色

愛云何謂。色界諸行爲緣所生。於色界行染污希求。由此能生色界苦果。無色愛云何。謂無色界諸行爲緣所生。於無色界行染污希求。由此能生無色界苦果。

欲取云何。謂於諸欲所有欲貪。見取云何。謂除薩迦耶見。於所餘見所有欲貪。戒禁取云何。謂於邪願所起戒禁所有欲貪。我語取云何。謂於薩迦耶見所有欲貪。初唯能生欲界苦果。餘三通生三界苦果。

欲有云何。謂欲界前時有業有。死有。中有。生有。及那落迦。傍生。餓鬼。人天。有總說名欲有。此復由先所作諸行煩惱攝受之所熏發。色有云何。謂除那落迦。傍生。餓鬼。人有。所餘是色有。應知。無色有云何。謂復除中有。所餘是無色有。應知。問。依何義故。建立七有。所謂那落迦。傍生。餓鬼。人天。有。業有。中有。答。依三種所作故。一能引有。謂一（業有）。二趣有。有謂一（中有）。三受用果。有謂五。

生云何。謂於胎卵二生初託生時。等生云何。謂卽於彼身分圓滿仍未出時。趣云何。謂從彼出。起云何。謂出已增長。出現云何。謂於溼化二生身分頓起。蘊得云何。謂卽於彼諸生位中。五取蘊轉。界得云何。謂卽彼諸蘊因緣所攝性。處得云何。謂卽彼諸蘊餘緣所攝。諸蘊生起云何。謂卽彼諸蘊日日飲食之所資長。命根出現云何。謂卽彼諸蘊餘壽力故。得相續住。蘊得謂蘊體起。界得謂蘊種子。蘊因緣性。蘊得現行成熟。

界得種子成熟。處得通現種餘三緣成熟。

此老略義者。謂依止變壞。鬚髮變壞。充悅變壞。火力變壞。無病變壞。色相變壞。威儀變壞。無色諸根變壞。有色諸根變壞。時分已過。壽量將盡。略義應知。

終云何。謂諸有情離解支節而死。盡云何。謂諸有情由解支節而死。壞云何。謂識離身。沒云何。謂諸色根滅。捨壽云何。謂氣將盡位。捨煖云何。謂不動位。棄捨諸蘊。命根滅云何。謂時死。死云何。謂遇橫緣非時而死。時運盡云何。謂初死未

久位。

第五節 別明緣生次第

問、何因緣故、無明等諸有支、作如是次第說。

答、諸愚癡者、要先愚於所應知事、次即發起邪行、由邪行故、令心顛倒、心顛倒

故、結生相續、生相續故、諸根圓滿、根圓滿故、二受用境。觸引受生俱受受用境

故、若耽著、若希求、由希求故、於方覓時、煩惱滋長、煩惱滋長故、發起後有愛非

愛業、由所起業、滋長力故、於五趣生死中、苦果生、苦果生已、有老死等苦、謂內

身變異所引老死苦、及境界變異所引憂悲苦、熱惱之苦、是故世尊如是次第

說十二支。依三世辨

復有次第差別、謂依二種緣、建立緣起次第、一內身緣、二受用境界緣、內身緣、

前六支所攝、受用境界緣、後六支所攝。

先於內身起我執等愚。由此不了一諸業所引苦果異熟一故，發起諸業。既發

起已，即隨彼業，多起尋思。現行識由業與識種子為助伴故，能感當來三種苦果。

引發種子謂根初起所攝苦果，名色支根圓滿所攝苦果，六處支受用境界所攝苦果。觸支

即名色為先，觸為最後。又於現法中，依觸緣受，發起於愛。由受用境界緣，廣起

追求。取支或由事業門，欲取或由利養門，我語取或由戒禁門，戒禁取或由解脫門，見發

起欲求。內身求，邪解脫求。如是求時，令先所起煩惱及業。能生果之支所引五趣

生死果生。既得生已，老死隨逐。依二世辨

第六節 簡明十二支體

觀心覺夢鈔云：問生死流轉，果依何而起耶。

答：論其本源，從無明起。所謂凡心極不明了，不知因果理，不了出離道三途苦

報，猶不能厭。何況人中天上勝果。此即第六相應意識心所分別無明力也。是名無

明支。

依止如是愚癡力故，所起善惡二種心行，皆悉成於流轉業因。今此業者，卽是第六相應思也。此思心所，或時信等善心所俱，身口意中，隨應造作一切善法。或時貪等諸煩惱俱，身口意中，隨應造作一切惡法。今此善惡三業思數，各熏種子。其諸種子，皆悉落在自己假我相續本識。第八阿賴耶識是名行支。

今此行支，隨能資助本識，是名行所持苦果種子。於其所資苦果種子，有五種類。一者本識能生種子，是名識支。

二者名色所攝種子，謂除本識能生種子及六處觸受種子外，所餘異熟身心世界之果。無記種子，是爲名色支。

三者眼等六根種子，是名六處支。此中意根，非是末那第七識，染污意，但取異熟等無間意。

四者異熟觸數

異熟果上觸心所

種子，是名觸支。

五者異熟受數種子，是名受支。今此識等五支種子，總論之者，卽是可生當來苦果，依正種子。

然異熟法，其性羸劣，不能獨生自果現行，必待於他強勝法助。是故隨彼善惡二業資助勢力，或生好果，或生惡果。好惡雖異，皆無記性。然此行等六支種子，必蒙潤緣，後生現行。譬如外種，雖在地中，蒙雨露潤，方生芽莖。內法種子，亦復如是。

其潤緣者，卽諸煩惱。若人發起煩惱之時，必潤當來苦果種子。雖煩惱皆有此力，以貪爲本。貪愛如水，殊有潤生勢力故也。是以若臨命終時，至細想現行之位，俱生下品微細貪愛，法爾而起，顧戀自體及境界等。爾時卽彼等六支種子正潤，然未至極。此品下貪，名爲愛支。

如是愛惜、數數相續、遂起上品俱生貪等。爾時卽彼六支種子潤緣悉具，生果功能，皆決定已。今此上品貪愛等惑，是名取支。

此愛及取正潤，卽是第六相應意識心所俱生煩惱。今此所潤行等六支，合名有支。

今此有支，至於託生最初剎那，正生苦果，依正二報有根身等，未衰變來，總名生支。

衰變以後，至命終位，總名老死。

今此一期，亦起無明。無明發業，乃至起愛潤苦種子，與前次第等無有異。如是

如是輪轉無窮，從無始際至於今也。緣生之相

故生死流，無明爲源。其無明者，卽是無明種子所生。其種子者，卽彼過去無明現行之所熏習。其所熏種在本識中，自類相生。無間斷故。如是如是生起無明。如是如是生無明故。如是如是輪轉不絕。其能持本識，亦從自種生。其本識種

子，還在本識中，即是六七二識所變相分所熏本質種也。其六七識，亦從六七二識種生，其種子者，卽六七識自所熏也。熏已亦在自本識中，如是一切種子，皆在第八識中，自類相生。譬如瀑流，相續不絕，無始以來，種生現行，現熏種子，種生種故，生死流轉，無盡者也。當知生死輪迴，唯是自心作也。緣生理

第七節 餘門分別

第一項 約四支

此十二支依成唯識論，約爲四支。文云，

一能引支，謂無明行，能引識等五果種故。此中無明唯取能發正感後世善惡業者，卽彼所發，乃名爲行。——卽彼所發感總三業也。

二所引支，謂本識內親生當來異熟果攝識等五種，是前二支所引發故。——五種之中，識種卽是本識之因，阿賴耶識因緣種也，除後六根能受三種，餘色

四蘊之因緣種，皆是名色種子所攝——識等五種，由業熏發，雖實同時，而依

主件識主總別名色總勝劣六處所依因果觸能生受為因相異故。諸聖教假

說前後，或依當來現起分位，有次第故，說有前後。

三能生支，謂愛取有，近生當來生老死故。謂緣迷內異熟果愚緣內異發一正

能招後有諸業，一為緣，引發親生，一當來生老死位五果種，一已復依迷外增

上果愚緣境發起貪愛。緣愛復生欲等四取。愛取合潤，一能引業種，一及一所

引因，一五轉名為有，俱能近有後有果故。

四所生支，謂生老死，是愛取有近所生故。謂從中有至本有中未衰變來，皆生

支攝。諸衰變位，總名為老。身壞命終，乃名為死。

第二項 總三道

成唯識論云，生死相續，由惑業苦。發業潤生煩惱，名惑。能感後有諸業，名業。業

所引生衆苦名苦。此惑業苦。應知總攝十二有支。謂從無明乃至老死。無明愛取。是惑所攝。行。有一分是業所攝。七。有一分是苦所攝。

中邊論云。行有是業道。無明愛取是煩惱道。餘七是苦道。

緣生三十論云。

初八九煩惱 第二第十業 餘七皆是苦 三攝十二法

釋曰。三煩惱者。無明渴愛取。二業者。行有。七報者。識名色六入觸受生老死等。此十二法三種所攝。

第三項 別三時

論云。初二。是過去。後二。未來時。餘八。是現在。此謂三時法。

釋曰。無明行初二種。過去時中。生老死後二種。未來時中。識名色六入觸受渴愛取有八種。現在時中。

唯識論云、此十二支、十因二果、定不同世。因中前七與愛取有、或異或同。若二
三七、各定同世。

述記云、定同世者、謂生老死二、愛取有三、無明等前七、各定同世。由癡發業、熏
發報種、必定同世故。前七支不得別世。起煩惱水潤先六種、轉名爲有、亦非異
時。非起能潤、隔世異時方成所潤。生及老死、同世可知。故二、三七各定同世。卽
此同世十支是因、二支是果。因在過去、果或現在、或在未來。因在現在、果未來
世。一往而論、二世緣起。道理而言、亦三世也。過去十因、現在二果、未來二果、現
在十因。卽是二世十二緣起。亦可言三世。若前七在過去、愛取有三在現在、生
老死二在未來、卽十二支通三世有。

卽十二支、或二世、或三世。別身造業、別身潤業故。不同小乘二因過去、五果現
在、三因現在、二果未來。時分緣起決定如是。

第四項 判假實

唯識論云、此十二支、九實三假、已潤六支、合爲有故、卽識等五、三相位別、名生等故。

述記云、假者謂有生、老死也。謂愛取所已潤行及識等五支、合前六支、轉名有故。所潤六中識等五種至現起時、謂四相中顯生異滅三相位別、名生老死、體卽識等。故有生、老死三是假也。

第五項 辨緣相

唯識論云、諸支相望、增上定有餘之三緣、因緣等無間緣所緣緣有無不定。契經依定、唯

說有一愛卽望於取、種生有望於生、種生有因緣義。若說識支是業種者、行望

於識亦作因緣、現行餘支相望、無因緣義。無明望行、愛望於取、生望老死、有餘

二緣、等無間緣有望於生、受望於愛、無等無間、有所緣緣、有受皆種種望於現非

彼果所緣故。餘支相望，二俱非有。此中且依鄰近順次，不相雜亂，實緣起說，異此相望，爲緣不定。

第八節 略說四緣

相宗綱要云：有爲諸法，從因緣生，如幻假有。謂色法依二緣生，卽因緣增上二緣是也。心法依四緣生。四緣者：一、因緣，二等無間緣，三、所緣緣，四、增上緣是也。因緣者，謂有爲法之能親辦自果者是也。此體有二：一、種子，二、現行。種子者，謂本識中善染無記諸界地等功能差別，能引次後自類功能。種生種是異時因果，故種望種爲自類同。及起同時自類果。果者現行也，種生現是同時因果，故種望現爲自類異品。此前滅種子，望彼後生種子，又此種子望彼現行，皆是因緣性。蓋此前滅種子，爲彼後生種子親辦自果。又此種子爲彼現行親辦自果故也。現行者，謂七轉識及彼相應。除佛果之一切善法及有漏中之極劣無記。之一切現行，皆能熏生各本識中之自類種子。此能熏之現行，望彼

所熏之種子，是因緣性。蓋此現行以彼所熏生之種子爲親辦自果故也。

等無間緣者，謂八現識

識在現行位

及彼心所，前聚於後，自類無間，等而開導，令彼

定生，是爲等無間緣也。蓋謂現行一聚之心心所，前滅後生之時，前聚無間等而開導，定令「後生之自類聚」得生。故以「開避引導之前聚」爲「此後生之聚」之緣也。

所緣緣者，謂若有體之法，是「帶已相之心或相應之心所」之所慮所託者，

此法卽是所緣緣也。

慮者緣慮義，託者依託義。此法爲心之所慮卽是所緣，又此法爲心所依託而起作用卽是緣也。具此二義卽爲所

緣緣

耳。如眼識見色時，此色爲識所緣慮，又此識依託此色而起，則此所見之色，

卽爲眼識之所緣緣。

增上緣者，謂若有法，有勝勢用，能於餘法或順或違，而使令生，就此與力不障

能令生之用，名爲增上緣也。

此順違用於生住，成得四處轉故。

生

范古農輯

第四章 生範

第一節 釋迦佛生

第一項 未生前相

菩薩本行經云。我於無量無邊諸佛所。種諸善根。爲轉輪聖王。值無量佛。最初值遇三十億佛。同名釋迦。次值八萬佛。同名然燈。次值三億佛。同名弗沙。次值九萬佛。同名迦葉。乃至次值迦葉佛。壽二萬歲。彼佛記我。汝於來世當得作佛。號釋迦牟尼。我如是奉事諸佛。修學佛意。爾乃生兜率天宮。一生補處位。大智度論云。釋迦人壽一萬歲時。合出。爲觀衆生無機可度。乃至百歲。見苦逼迫。劫將欲末。故出乎世。

第二項 大機所見生相

華嚴經云。菩薩從兜率天將降神時。有十佛刹微塵數菩薩。皆與菩薩同願同行。乃至普賢神通行願悉皆同等。又以神通普現兜率天宮。一一宮中悉現十方一切世界闍浮提內受生影像。

菩薩已從此沒。生於人間淨飯王家。乘梅檀樓閣。處摩耶夫人胎。

菩薩於母胎中。現大宮殿。種種嚴飾。而令母身安隱無患。住母胎已。心恆正念。示現住兜率天。初生爲童子。處王宮。出家苦行。成道轉法輪。般涅槃。或有見佛種種說法。或見在兜率天。或見來處母胎。或見初生。或見出家。或見成道。或見轉法輪。或見入涅槃。

夫人攀金園樹枝。而生菩薩。諸天王衆。各持香水。共以洗沐。初生之時。於十方面各行七步。

大智度論云。太子生時。足行七步。口稱獨尊。言已便默。如諸嬰孩。不行不語。諸母養育。漸至長大。

第三項 小機所見生相

因果經云。菩薩功行滿足。位登一生補處。生兜率天。名曰聖善。爲諸天王說補處行。期運將至。當下作佛。卽觀五事。觀諸衆生。皆是我發心已來所成熟者。堪受妙法。觀此大千界。閻浮提迦毗羅國。最爲處中。觀釋迦第一甘蔗聖王之後。觀白淨王夫妻眞正。堪爲父母。觀摩耶夫人懷抱太子。滿足十月。生七日已。其母命終。作此觀已。告諸天子。我應下生白淨王家。棄輪王位。出家學道。成一切種智。轉大法輪。廣利人天。汝等是時。亦當同會。諸天子聞。各心念言。菩薩不久。當成正覺。

時菩薩乘六牙白象。發兜率宮。放大光明。普照十方。以四月八日明星出時降

神母胎時摩耶夫人眠寤之際，見六牙白象騰空而來，從右脅入，覺已白，王爲說瑞相。王召婆羅門占之曰：今此夫人胎中之子，必是正覺之瑞。若不出家，當爲轉輪王。夫人日更修行六度，天獻飲食，不樂人間之味。時兜率天衆念言：菩薩已生淨飯王宮，我等亦當下生人間，得先聽法。於是諸天下生，數至九十九億，又他化自在天下至四天王，上至色界，與其眷屬，亦皆下生，不可稱計。

佛本行經云：有一天子，名曰速往。至諸地獄，大聲唱言：菩薩從兜率天下生，母胎汝輩速發誓願，求生人間。地獄衆生聞此語已，各各相覩，復見光明，捨地獄身，卽生人中。所有大千世界往昔已來種善根者，皆來於此迦毘羅城，四面託生。

菩薩在母胎，行住坐臥，無所妨礙。晨朝爲色界諸天說法，日中爲欲界天，晡時爲諸鬼神。於夜三時，亦復如是，成熟衆生。

周昭王二十六年甲寅，夫人懷孕，將滿十月。其父善覺，遣使白王，我女懷藏聖胎，威德甚大，慮產子後，女命不久，欲迎止嵐毘園中，盡父子情。王即敕有司備儀禮，送至父家。時夫人即升寶輿，前後導從，往嵐毘尼園中。十月滿足，四月八日，日初出時，夫人見無憂樹花葉茂盛，即舉右手欲牽摘之。菩薩漸漸從右脅出，時樹下生七寶蓮華，大如車輪，身墮華上，自行七步，舉右手作獅子吼云：我於天人之中，最尊最勝。時四天王，即以天繒接置寶几，帝釋執寶蓋，梵王持白拂，侍立左右。難陀兄弟二龍王，於虛空中吐清淨水，一溫一涼，以灌太子。身黃金色，三十二相，放大光明，照三千界。天龍八部，空中作樂歌頌佛德，散華亂墜。一切天人讚歎種智，速成佛道，度脫衆生。唯有魔王不安本座，於時采女以天繒氎裏抱太子至夫人所。青衣還宮，說奇瑞相。王即嚴駕四兵，導從入園，見相殊特，喜懼交懷。前抱太子，置象輿上，隨從入城，將詣天祠，梵釋形像皆起禮足。

而言曰。今此太子，天人中尊，云何來此欲禮於我。羣臣歎異，卽奉太子入王本宮。時諸釋同日生五百男，王家青衣亦生五百蒼頭。王廐象生白子，馬生白駒，牛羊亦生五色羔犢，數各五百。宮中五百伏藏，自然而出。有諸商人，入海采寶而還，各貢珍奇。王召諸婆羅門，當爲太子作何等名。答言：太子生時，一切寶藏，皆悉發出，所有諸瑞，莫非吉祥，當名薩婆悉達。此云一切義成。

太子生滿七日，其母命終，以懷太子功德大故，上生忉利，時姨母摩訶波闍波提乳養太子，如母無異。

第二節 彌勒佛生

佛說彌勒下生經（羅什法師第三譯）云。

四大海水，以漸減少三千由旬。是時閻浮提地，長十千由旬，廣八千由旬，平坦如鏡。人壽八萬四千。是時有一大城名翅頭末，莊飾清淨，福德之人，充滿其中。

其國爾時，有轉輪王，名曰儂佉。翹頭末城，衆寶羅網，彌覆其上。寶鈴莊嚴，微風吹動，其聲和雅，如扣鐘磬。其城中有大婆羅門，主名曰妙梵，婆羅門女名曰梵摩波提，彌勒託生，以爲父母。身紫金色，三十二相，衆生視之，無有厭足。佛說觀彌勒菩薩下生經云。

將來久遠，於此國界，當有城郭，名曰雞頭。土地豐熟，人民熾盛。爾時法王出現，名曰儂佉，正法治化。彼王有大臣，名曰修梵摩。是王少小同好，王甚愛敬。又且貌顏端正，不長不短，不肥不瘦，不白不黑，不老不少。是時修梵摩有妻，名梵摩越玉。女中最極殊妙，如天帝妃，口作優鉢羅華香，身作梅檀香，諸婦人八十四態，永無復有，亦無疾病亂想之念。爾時彌勒菩薩，於兜率天，觀察父母，不老不少，便降神下，應從右脅生。兜率諸天，各各唱言：彌勒菩薩，已降神生。是時修梵摩，卽與子立字，名曰彌勒。彌勒菩薩，有三十二相，八十種好，莊嚴其身，身黃金

色。爾時人壽極長，無有諸患，皆壽八萬四千歲。

第三節 上生兜率

第一項 菩薩自生

佛說觀彌勒菩薩上生兜率陀天經云。

如來應正徧知，今於此衆，說彌勒菩薩摩訶薩阿耨多羅三藐三菩提記。此人從今十二年後命終，必得往生兜率天上。

佛告優波離，卻後十二年二月十五日，於波羅奈國劫波利村波婆利大婆羅門家本所生處，結加趺坐，如入滅定。身紫金色，光明豔赫，如百千日。上至兜率陀天。其身舍利，如鑄金像，不動不搖。身圓光中，有首楞嚴三昧般若波羅密字義炳然。時諸天人尋卽爲起衆寶妙塔，供養舍利。時兜率陀天七寶臺內，摩尼殿上，師子牀坐，忽然化生於蓮華上，結加趺坐。身如闍浮檀金色，長十六由旬。

三十二相、八十種好、皆悉具足。頂上肉髻、髮紺瑠璃色。釋迦毘楞伽摩尼、百千萬億甄叔迦寶、以嚴天冠。其天寶冠、有百萬億色。一一色中有無量百千化佛、諸化菩薩、以爲侍者。復有他方諸大菩薩、作十八變、隨意自在。住天冠中。彌勒眉間、有白毫相光、流出衆光、作百寶色。三十二相、一一相中、五百億寶色。一一好中、亦有五百億寶色。一一相好、艷出八萬四千光明雲。與諸天子各坐華座、晝夜六時、常說不退轉地法輪之行。經一時中、成就五百億天子、令不退於阿耨多羅三藐三菩提。

第二項 衆生往生

佛告優波離、佛滅度後、我諸弟子、若有精勤修諸功德、威儀不缺、掃塔塗地、以衆名香妙華供養、行衆三昧、深入正受、讀誦經典、如是等人、應當至心、雖不斷結、如得六通、應當繫念、念佛形像、稱彌勒名。如是等輩、若一念頃、受八戒齋、修

諸淨業，發弘誓願，命終之後，譬如壯士屈伸臂頃，卽得往生兜率陀天，於蓮華上結加趺坐。百千天子作天伎樂，持天曼陀羅華，摩訶曼陀羅華以散其上。讚言：善哉善哉，善男子，汝於閻浮提廣修福業，來生此處，此處名兜率陀天，今此天主名曰彌勒，汝當歸依。應聲卽禮，禮已諦觀眉間白毫相光，卽得超越九十億劫生死之罪。是時菩薩隨其宿緣爲說妙法，令其堅固不退轉於無上道心。如是等衆生，若淨諸業，行六事法，必定無疑當得生於兜率天上，值遇彌勒，亦隨彌勒下閻浮提，第一聞法。於未來世值遇賢劫一切諸佛，於星宿劫亦得值遇諸佛世尊。於諸佛前，受菩提記。

佛告優波離，佛滅度後，比丘比丘尼優婆塞優婆夷天龍夜叉乾闥婆阿修羅迦樓羅緊那羅摩睺羅伽等，是諸大衆，若有得聞彌勒菩薩摩訶薩名者，聞已歡喜恭敬禮拜。此人命終，如彈指頃，卽得往生，如前無異。

但得聞是彌勒名者，命終亦不墮黑闇處，邊地邪見，諸惡律儀，恆生正見眷屬，成就不謗三寶。

若善男子善女人，犯諸禁戒，造衆惡業，聞是菩薩大悲名字，五體投地，誠心懺悔，是諸惡業速得清淨。未來世中諸衆生等，聞是菩薩大悲名稱，造立形像，香華衣服，繒蓋幢幡，禮拜繫念。此人命終時，彌勒菩薩放眉間白毫大人相光，與諸天子，雨曼陀羅華，來迎此人，須臾即得往生。值遇彌勒，頭面禮敬。未舉頭頃，便得聞法，即於無上道得不退轉。於未來世得值恆河沙等諸佛如來。

佛滅度後，四部弟子，天龍鬼神，若有欲生兜率天者，當作是觀。繫念思維，念兜率陀天，持佛禁戒，一日至七日，思念十善，行十善道。以此功德迴向願生彌勒前者，當作是觀。作是觀者，若見一天人坐一蓮華，若一念頃，稱彌勒名，此人除卻二百劫生死之罪。但聞彌勒名，合掌恭敬，此人除卻五十劫生死之罪。若

有禮敬彌勒者，除卻百億劫生死之罪，設不生天，未來世中，龍華菩提樹下，亦得值遇，發無上道心。

第四節 往生極樂

第一項 七日往生

佛說阿彌陀經云。

若有善男子善女人，聞說阿彌陀佛，執持名號。若一日若二日若三日若四日若五日若六日若七日，一心不亂。其人臨命終時，阿彌陀佛與諸聖衆，現在其前。是人終時，心不顛倒，即得往生阿彌陀佛極樂國土。

第二項 三輩往生

無量壽佛經云。

十方恆沙諸佛如來，皆共讚歎無量壽佛威神功德不可思議。諸有衆生聞其

名號信心歡喜，乃至一念至心迴向，願生彼國，卽得往生，住不退轉。唯除五逆誹謗正法。

十方世界諸天人民，其有至心願生彼國，凡有三輩。其上輩者，捨家棄欲而作沙門，發菩提心，一向專念無量壽佛，修諸功德，願生彼國。此等衆生，臨壽終時，無量壽佛與諸大衆現其人前，卽隨彼佛往生其國，便於七寶華中，自然化生。住不退轉，智慧勇猛，神通自在。

其中輩者，十方世界諸天人民，其有至心願生彼國，雖不能行作沙門，大修功德，當發無上菩提之心，一向專念無量壽佛，多少修善，奉持齋戒，起立塔像，飯食沙門，懸繒然燈，散華燒香，以此迴向願生彼國。其人臨終，無量壽佛化現其身，光明相好，具如眞佛，與諸大衆現其人前，卽隨化佛往生其國，住不退轉，功德智慧，次如上輩者也。

其下輩者。十方世界諸天人民，其有至心欲生彼國。假使不能作諸功德，當發無上菩提之心，一向專意，乃至十念念無量壽佛，願生其國。若聞深法，歡喜信樂，不生疑惑，乃至一念念於彼佛，以至誠心願生其國。此人臨終夢見彼佛，亦得往生。功德智慧，次如中輩者也。

第三項 九品往生

觀無量壽佛經云。

上品上生者，若有衆生，願生彼國者，發三種心，即便往生。何等爲三？一者至誠心，二者深心，三者迴向發願心。具三心者，必生彼國。復有三種衆生，當得往生。何等爲三？一者慈心不殺，諸具戒行；二者讀誦大乘方等經典；三者修行六念。迴向發願，願生彼國。具此功德，一日乃至七日，即得往生。生彼國時，此人精進勇猛，故何彌陀如來與觀世音大勢至無數化佛百千比丘聲聞大衆無量諸

天七寶宮殿。觀世音菩薩執金剛臺。與大勢至菩薩至行者前。阿彌陀佛放大光明。照行者身。與諸菩薩授手迎接。觀世音大勢至與無數菩薩讚歎行者。勸進其心。行者見已。歡喜踊躍。自見其身乘金剛臺。隨從佛後。如彈指頃。往生彼國。生彼國已。見佛色身衆相具足。見諸菩薩色相具足。光明寶林。演說妙法。聞已。卽悟無生法忍。經須臾間。歷事諸佛。徧十方界。於諸佛前。次第受記。還至本國。得無量百千陀羅尼門。是名上品上生者。

上品中生者。不必受持讀誦方等經典。善解義趣。於第一義心不驚動。深信因果。不謗大乘。以此功德迴向。願求生極樂國。行此行者。命欲終時。阿彌陀佛與觀世音大勢至無量大衆眷屬圍繞。持紫金臺。至行者前。讚言。法子。汝行大乘。解第一義。是故我今來迎接汝。與千化佛。一時授手。行者自見坐紫金臺。合掌叉手。讚歎諸佛。如一念頃。卽生彼國七寶池中。此紫金臺。如寶蓮華。經宿則開。

行者身作紫磨金色，足下亦有七寶蓮華。佛及菩薩俱時放光，照行者身。目卽開明，因前宿習，普聞衆聲，純說甚深第一義諦。卽下金臺，禮佛合掌，讚歎世尊。經於七日，應時卽於阿耨多羅三藐三菩提得不退轉。應時卽能飛行徧至十方，歷事諸佛。於諸佛所，修諸三昧，經一小劫，得無生忍，現前受記。是名上品中生者。

上品下生者，亦信因果，不謗大乘，但發無上道心，以此功德迴向願求生極樂國。行者命欲終時，阿彌陀佛及觀世音大勢至與諸菩薩，持金蓮華，化作五百佛，來迎此人。五百化佛，一時授手，讚言：法子，汝今清淨，發無上道心。我來迎汝。見此事時，卽自見身坐金蓮華，坐已華合，隨世尊後，卽得往生七寶池中。一日一夜，蓮華乃開。七日之中，乃得見佛。雖見佛身，與衆相好，心不明了。於三日後，乃了了見。聞衆音聲，皆演妙法。遊歷十方，供養諸佛。於諸佛前，聞甚深法。經三

小劫得百法明門，住歡喜地。是名上品下生者。

中品上生者。若有衆生，受持五戒，持八戒齋，修行諸戒，不造五逆，無衆過患，以此善根迴向願求生於西方極樂世界。臨命終時，阿彌陀佛與諸比丘眷屬圍繞，放金色光，至其所，演說苦空無常無我，讚歎出家得離衆苦。行者見已，心大歡喜，自見己身，坐蓮華臺，長跪合掌，爲佛作禮。未舉頭頃，卽得往生極樂世界。蓮華尋開，當華敷時，聞衆音聲，讚歎四諦。應時卽得阿羅漢道，三明六通，具八解脫。是名中品上生者。

中品中生者。若有衆生，若一日一夜持八戒齋，若一日一夜持沙彌戒，若一日一夜持具足戒，威儀無缺。以此功德迴向願求生極樂國，戒香熏修。如此行者，命欲終時，見阿彌陀佛與諸眷屬，放金色光，持七寶蓮華，至行者前。行者自聞空中有聲讚言：善男子，如汝善人，隨順三世諸佛教故，我來迎汝。行者自見坐

蓮華上蓮華卽合。生於西方極樂世界在寶池中。經於七日。蓮華乃敷。華既敷已。開目合掌讚歎世尊。聞法歡喜。得須陀洹。經半劫已。成阿羅漢。是名中品中生者。

中品下生者。若有善男子善女人。孝養父母。行世仁慈。此人命欲終時。遇善知識。爲其廣說阿彌陀佛國土樂事。亦說法藏比丘四十八願。聞此事已。尋卽命終。譬如壯士屈伸臂頃。卽生西方極樂世界。經七日已。遇觀世音及大勢至。聞法歡喜。得須陀洹。過一小劫。成阿羅漢。是名中品下生者。

下品上生者。或有衆生。作衆惡業。雖不誹謗方等經典。如此愚人。多造惡法。無有慚愧。命欲終時。遇善知識。爲說大乘十二部經首題名字。以聞如是諸經名故。除却千劫極重惡業。智者復教合掌叉手。稱南無阿彌陀佛。稱佛名故。除五十億劫生死之罪。爾時彼佛。卽遣化佛化觀世音化大勢至行者前。讚言。善男

子以汝稱佛名故，諸罪消滅。我來迎汝。作是語已，行者即見化佛光明徧滿其室。見已歡喜，即便命終乘寶蓮華，隨化佛後，生寶池中。經七七日，蓮華乃敷。當華敷時，大悲觀世音菩薩及大勢至菩薩，放大光明，住其人前，爲說甚深十二部經。聞已信解，發無上道心。經十小劫，具百法明門，得入初地。是名下品上生者。

下品中生者。或有衆生，毀犯五戒八戒及具足戒。如此愚人偷僧祇物，盜現前僧物，不淨說法，無有慚愧，以諸惡業而自莊嚴。如此罪人以惡業故，應墮地獄。命欲終時，地獄衆火一時俱至。遇善知識以大慈悲，即爲讚說阿彌陀佛十力威德，廣讚彼佛光明神力，亦讚戒定慧解脫解脫知見。此人聞已，除八十億劫生死之罪，地獄猛火，化爲清涼風，吹諸天華。華上皆有化佛菩薩迎接此人。如一念頃，即得往生七寶池中蓮華之內。經於六劫，蓮華乃敷。觀世音大勢至以

梵音聲、安慰彼人、爲說大乘甚深經典。聞此法已、應時卽發無上道心。是名下品中生者。

下品下生者。或有衆生、作不善業、五逆十惡、具諸不善。如此愚人以惡業故、墮惡道、經歷多劫、受苦無窮。如此愚人、臨命終時、遇善知識、種種安慰、爲說妙法、教令念佛。彼人苦逼、不遑念佛。善友告言、汝若不能念佛者、應稱無量壽佛。如是至心、令聲不絕、具足十念、稱南無阿彌陀佛。稱佛名故、於念念中、除八十億劫生死之罪。命終之時、見金蓮華、猶如日輪、住其人前。如一念頃、卽得往生極樂世界。於蓮華中、滿十二大劫、蓮華方開。觀世音大勢至、以大悲音聲、爲其廣說諸法實相、除滅罪法。聞已歡喜、應時卽發菩提之心。是名下品下生者。

生日紀念終



AS41 212 0010 1604B

古農行年五十家人欲以爲慶余以爲光陰如水逝者不來安用慶爲惟既叨生於世允宜知生之所以及何以善其生者因集經典之說生者輯爲一編出版問世除贈送親朋外概歸書局流通以此宏法功德藉消多生業障余願足矣所望

世之慶其生者取是編而重印流通焉則以續佛慧命者延己壽命有不如操左券哉

輯者敬啓

民國十九年十月初版

生日紀念 全二冊

流通價洋壹角

重印千冊洋五十元

編輯者 范古農

出版者 佛學書局

發行者 佛學書局

上海北火車站東首寶山路口
開北新民路國慶路口

印刷者 國光印書局

上海南成都路新大沽路口
電話三三七四三號

